

Ubvur Uburhu aka atsenge abi Uafisa Utsutson ri itsi ubvur Uafisa

Awu Uburhu unga atseng ubvur uwirɛ ri ivangyɛ unga aka awe ru ugbor uzĩ ru Uroma. Atseng ubvur uwirɛ ugɛɛ ra amɛk aki 60 udzur ru unumkpi umbɔ aka amar Uyesu. Uburhu atsenge ubvur uwurɛ ra abi Uafisa ugɛ umbɔ aba avarha amaambɔ, umbɔ adene umgbɔ uzĩ ra abika adɔsa abɔɔ.

Undzumu ubinkpi uku uwe ru ubvur uwirɛ awu ubinkpi Unum aka anyanga ra amɛnnga awuri ikɔng anera ru upfung kishoo atsuke ra anɔnɔr ijee Uyesu Ukiristo, asi íwea anera ukpekũ, bɔr nggu kishoo abin aka amuna ra afã nu abĩ. Ubvur ha uni idɛyiwe udĩkpi Unum Ute aka akũ aseng anernga, unga adɛyiwe imimutanga ru udĩ itsũwe arhimmbɔ, na afɔrhe umbɔ ri ijee arhim ru ubok akpe Uyesu Ukiristo, utsekũ unga aka atsu ibibemuwenga itsuifer ri idene Ipfu Isarsatangge. Ubvur ha ufituwe abika adɔsa ugɛ umbɔ aseɪ iseimbɔ ru utsĩndĩwi iki idɛyiwe ugɛ awu idzidzerhe umbɔ awu unying. Ikɛi ubvur ha ufituwe abika adɔsa ugɛ umbɔ asisei nggu adɔka ru udĩkpi uku idɛyiwe ugɛ umbɔ awu abika adɔsa.

Ru ubvur uwirɛ awuri ikpombɔ arherhake aka adɛyiwe iwerha aner Unum nggu Ukiristo. Akpanga aner Ukiristo nggu iyor unera, Ukiristo iganga awu itsia. Akpanga umbɔ nggu utsɛrh uku ufa, Ukiristo unga awu utsak uku ufa. Akpanga

umbɔ nggu idzin, Ukiristo unga awu utarhkpi uku utsu idzina kishoo idɛɛ iker.

Abinkɛ aka awe umɔ

Utsutson (1.1-2)

Ukiristo nggu ikikɔng abika adɔsa (1.3–3.21)

Urhɛ uku ufa ru ubok Ukiristo (4.1–6.20)

Arherhe aki imaatak (6.21-24)

¹ Awu umum Uburhu itseng ubvur uwirɛ. Umum iwu uner itser Uyesu Ukiristo. Unum aseng umum iwu uner itser Uyesu.

Umum itsenge ubvur uwurɛ ra abika adɔsa ru uteu Uafisa, abika awe ru imangmang ru Ukiristo Uyesu.

² Imimuta nu ididɔɔr idzeku Unum Utemɛn nu Uteijee Uyesu Ukiristo iba ru umbi.

Idorh ru ubok Ukiristo

³ Ikpikpoi iwe ru Unum nu Utɛ uwu Uteijeemɛn Uyesu Ukiristo, aka atsukanga ri ipfumɛn ubɛn idorh iki idze ra afã ru ubok iwerhemɛn nggu Ukiristo.

⁴ Unga aka asenga umɛn ru ubok Ukiristo na adɔrha amunu upfunga, ngge itsu umɛn iwe asasar ni ishimɛn ru uvau ra asunga. Ri ibibema

⁵ unga aka atsũ umɛn isha rimɔɔ umɛn iwe ru nyaka angwɛnga ru ubok Uyesu Ukiristo. Unum atsũ ikorha akɛɛ ha nu ake atsu unga agũibɛn.

⁶ Umɛn ikpoi unga ru nggaa imimutanga aka adzaa umɛn izũwã ru ubok uwu ha unga aka abema.

⁷ Uyesu afai arhimɛn nggu adzirhnga. Aka atsũwãmbɔ arhimɛn na afɔnambɔ umɛn. Unum akorhe rimi ubinkutsu unga awea ru nggaa imimuta iyiriye

⁸ unga aka adzaa ru umen irheirhe. Nggu itsoi nu ihwihweng kishoo,

⁹ unga aka adeyiwanga umen ubinkpi uku uwe ri iwok unga aka abee ikorhe ru ubok Ukiristo.

¹⁰ Unum awuri itsu ake atō itser ri ivanga uku kpengkpeng ngge itsú abina kishoo ra afā nu abī awe ananga unying ru ijee Ukiristo.

¹¹ Unum atsu abina kishoo ru nyaka unga aka abee na aseng umen isha rimōō iwe abinga ru ubok iwerhemēn nggu Ukiristo.

¹² Unga akorha akere ha ngge itsú umen, abika agbaashia ifosa ru Ukiristo, ama akpoi unga ru nggaa irhirhangnga.

¹³ Nu umbi ikēi aka atomumbō umbi ru Ukiristo ivang umbi aka igū urhem idzidzerhe, Isarhe Iyiki Ize iyi ififorhmbi. Ri ivangmbi aka awe ru imang-mang, umbō aka atsuka umbi Ipfu Isarsatangge iyiriyē umbō aka abemuwe nu ngge iwe utsar uge umbi awe abi Unum.

¹⁴ Ipfu Isarsatangge ha Unum aka adzaa umen ngge itsú umen ihweng uge unga awuri idzaanga ukammēn unga aka abemuwa umen. Umen iwuri ikpomēn abin hā ri ivangyē Unum aka idzuma afōna umen abirabē iki iwe abinga, ngge itsú umen ikpoi unga ru nggaa irhirhangnga.

Itar uwēē nu ifen-Num

¹⁵ Umum iki igūmum arherhe imangmangmbi ru Uteijee Uyesu nu ibibemambi ra abika adōsa kishoo.

¹⁶ Nggee umum isi inekukū ifen-Num ni itar uwēē ru unga ri itsimbi.

¹⁷ Inu irhusa Unum uwu Uteijeemēn Uyesu Ukiristo, Ute uwu ikpikpoi, ama adzaa umbi Ipfu

itsoi na adeyiwa itsinga ru umbi, ngge itsú umbi ama ahweng unga atai.

¹⁸ Umum ifen-Num ikéi uge unga ama ayanguwa amɛnmɛn ngge itsú umbi ahweng ifosaye unga aka ayisa umbi awe. Ifosa hã iwe iyiyeyi nggaa idorhnga aka abemuwe abika adɔsa.

¹⁹ Umum ifen-Num ikéi iɣe nu umbi ahweng ijeenga iki inangge uben ijee. Ijee ha iyika umɛn abi imangmang ru Ukiristo. Iyerɛ ana awe nggaa ijee ha

²⁰ iyiriyɛ Unum aka akũ ri ivangye unga aka asoyiwe Ukiristo ra akpe na atsu unga aseɪ nu ubok ughanga ra afã.

²¹ Ukiristo agha iyerhe ananga uben iyerhe, uben ikpũ ípfu iyiki igha iyerhe nu iyiki iwe ru ijee akarhãrhã, ípfu itser-Num nu ípfu iyiki ibewe kishoo. Ugaunga unangkpɔ uben ugau. Asi iwea ri ivang iyerɛ ukpekũ bɔr nu ivang iyiki ibiba ikéi.

²² Unum aka atsukuka abina kishoo ra andaidaknga na atsũ unga awe itsia ru uben ubin ri iyike abika adɔsa,

²³ aka awe iyornga. Unga atsu atɔke umbɔ na atsu atɔke uben abin ra ananga kishoo.

2

Isisok ra akpe nggu Ukiristo

¹ Umbi aka agaumbi nggu Unum ri itsi arhimmbi.

² Ri ivang hã umbi aka isaka idɔsa atsĩndĩ abi upfung ukpire nu Undenggũ. Unga agha iyerhe ípfu iyiki ibewe nu icere unga ani itɔ itser ra abika akpẽ idɔsu Unum.

³ Umən kishoo igamən ibekmən ru nyaka umbō ri ivangye umən idōsi nggaa amən aki arhim ni ikorha abinkε ngge iki ibee ri iferhkongge. Ru nyaka umbō kishoo ngge itsu Unum awe ra avəm nggu umən. Amar umən ru nyaka ha.

⁴ Bər Unum abema umən akarhārḥā, nu atorhnga awe arḥerḥε.

⁵ Arhimmən atsu umən ikpe, bər Unum aka asoyiwa umən nggu Ukiristo umən iwe ru urḥε. Awu imimuta itsu umən ikpo ififərḥ.

⁶ Unum asoyiwa umən nggu Ukiristo Uyesu na atsu umən isei nggu unga ra afā ru ubok iwerhemən nggu unga.

⁷ Unum akorha akεε ha ngge itsú unuma unga awuri idεyiwanga uge imimutanga inangngge abina kishoo. Unga adeyiwa umən akεε ha ru ubok inna ḥā Ukiristo Uyesu aka akorhe.

⁸ Awu ru ubok imimuta umbō aka afərḥ umbi, ru ubok imangmangmbi ru Ukiristo. Asi iwea ikikorhambi, awu izūwū Unum.

⁹ Asi iwea ru ubok itser iyiki ize, nggee unera asi ídēē afīrhūnga.

¹⁰ Umən iwe abinkε Unum aka amuna. Unga agbisha umən ru ubok iwerhemən nggu Ukiristo Uyesu nu umən itō itser iyiki ize, iyiriyε unga aka abee umən itō isha rimōō.

Unying ru Ukiristo

¹¹ Nggee, àka ayita uge umbi asi iwembi abi Uyahuda ri imar. Abika ayisa atsimbō <<abi usorhe>> ayisa umbi <<abirabε aka ashimbō nu usorhe>>. Bər usorhe uwe ubinkpi anera aka akū abok akorhe.

¹² Àka ayita uge ri ivang hã umbi aka asi iwembi nggu Ukiristo, umbi asi iwembi aner Uisrairha, umbi awe abirabe aka asi íyεimbɔ ubinkpi Unum aka abemuwe abi Uyahuda. Umbi ashimbi ri ifosa na ashimbi ru Unum ru upfung.

¹³ Ri ivang hã umbi adermbi ru Unum, bɔr icεε ru ubok iwerhembɔ nggu Ukiristo Uyesu, umbɔ aka akūna umbi aba akhapa ru ubok adzirh Ukiristo.

¹⁴ Ukiristo nibikanga awe ididɔɔrmɛn. Unga atsu abi Uyahuda nu atsen abi Uyahuda awe unying na abupuwe ubandzin ukpuku ukpukpɛɛ uku utsu igigau.

¹⁵ Unga akorha akεε ri ikwεete Íkpem ri ivangye unga aka akpe. Unga akpenuwe ri ifɛna kishoo abinkε Íkpem iki igɔr igε awu ufang ngge ikorhe. Unga abee itsu abi Uyahuda nu atsen abi Uyahuda awu unying ru ubok iwerhembɔ nggu unga, iyiriye iki itsu ididɔɔr.

¹⁶ Ru ukpui uku ufa ha, unga agbopa umbɔ ru Unum ru ubok akpenga ri igãrhãmau ucucii na afere ikpikpɛɛmbɔ.

¹⁷ Unga aba adūwã Isarhe Iyiki Ize iyi ididɔɔr ru umbi aka awe ukuka ru Unum nu ididɔɔr ra abika akhapa ru unga.

¹⁸ Ru uboknga umɛn iki ikpo utsĩndĩ uwuku uzĩ ru Ute ri Ipfu-Num unying.

¹⁹ Umbi abirabe aka asi iwembi abi Unum na awe atsen, umbi asi iwembi rimi icεε, bɔr umbi awe abi ugau ra aner Unum aka awe abi iyanga.

²⁰ Adzin iya ha nu atarh idzin abi itser Uyesu nu abika asɔm Arherhu-Num, nggu Ukiristo Uyesu nibikanga aka awe utarh āgboki idzin.

²¹ Ru unga agbopi iya ha kishoo iwe unying na atsu ike iwe Iya-Num isarsatake ru Uteijee.

²² Ru unga, umbi aka awe atsen abi Uyahuda ikei umbɔ anu idzin umbi awe urhonga ri iya ra anangke Ipfu-Num iki isei.

3

Uburhu nu atsen abi Uyahuda

¹ Akere ha utsu umum, Uburhu, ifena-Num ru umbi. Umum iwe ru ugborzi ru ubok idzowe Isarhe Ukiristo Uyesu ru umbi atsen abi Uyahuda.

² Idzidzerhe umbi aka agumbi Unum aka acorhuwa umum na adzaa itser iyere umum itɔwã umbi.

³ Ngge iwu iwiwɔk Unum unga aka adeyiwa umum ri irhi, iyiriyere umum iki itarzhang itseng.

⁴ Ivangyere umbi aka ivarhe itseng iyere, mɔce umbi awuri idɛɛ ahwengmbi iwiwe uwu ihwihwengmum ri iwiwɔk Ukiristo.

⁵ Iwiwɔk iyere umbɔ asi itsu undankpu isha ahwengmbɔ. Icere Unum aka atsu Ipfunga itsu ihwihweng izi ra asarkasar abi itser Uyesu nu abika asom Arherhu-Num.

⁶ Iwiwɔk ha iwu uge ru ubok Isarhe Iyiki Ize atsen abi Uyahuda awe abi ukam nggu Uisairha. Umbɔ awe iyora unying, na agasha urhonga ri ibibemuwe ru ubok imangmang ru Ukiristo Uyesu.

⁷ Umum iwe uner itser Isarhe Iyiki Ize iyere ru ubok ijee Unum nu iziũwũ umatanga aka adzaa umum.

⁸ Umum ihweng, umum iwe uku ucia ru kishoo abika adɔsa, bɔr umata ukpire unga aka adzaa

umum, iyiriyε umum iki idzowe ra atsen abi Uyahuda, isarhe idorh iyi Ukiristo iki isi ímaangge,

⁹ ni idεyiwe ubεn unera ukupεε iwiwɔk Unum, uwuku umuna abina kishoo aka awɔk isha rimɔɔ.

¹⁰ Ubin Unum aka abee ikorhe, abee itsu ayεrhe nu abi ijee aka awe ípfu ahwεng nggaa itsoinga icεε. Unga abee akũ ikikɔng abika adɔsa akorha akεε ha.

¹¹ Unga abee ikorha akεε ha na adɔrha amunu upfunga iyiriyε unga aka akorhe ru ubok Ukiristo Uyesu Uteijeemen.

¹² Ru unga nu ru ubok imangmangmen ru unga, umen idεε izĩ ru Unum nggu ififɔn nu ikeramen.

¹³ Umum ishɔrhã umbi uge niba atsũwũkumbi amɛnm̃bi ri itsi ayetnummum ri itsimbi, ake awe ikpikpoinbi.

Uburhu afene-Num ra abi Uafisa

¹⁴ Ngge itsu umum itar arhu ru Utε.

¹⁵ Ru unga abi iyanga kishoo ra afã nu abĩ aka akpo itsokmbɔ.

¹⁶ Umum ifen-Num uge ru nggaa igɔngnga, unga ama atsuka umbi iker ru ubok Ipfunga ra amɛnm̃bi,

¹⁷ ngge itsú Ukiristo ama aseɪ ra amɛnm̃bi ru ubok imangmang. Umum ifen-Num uge umbi adεε aker ri ibibema,

¹⁸ na awe ru ijee nggu abika adɔsa kishoo. Umum ifen-Num uge umbi awuri ihwεngm̃bi itei nu ider nu igɔng nu ighor ibibemu Ukiristo iwu uguse,

¹⁹ na ahwεng ibibemayε iki inangngge ihwihwεng. Umum ifen-Num ikεi uge umbi ama adzuma atɔk nggu ikikorhe iyi Unum.

²⁰ Unum adēē akorha abinkε aka anangke ubinkpi umen iki irhusa unga use abinkε umen iki iferhkε unga adēē akorhunga, ru ubok ijeenga iki itō itser ru umen.

²¹ Abika adōsa nu Ukiristo Uyesu ama akowe unga ikpikpoi ru kishoo andanna ugbagbaa! Iwerimi.

4

Abika adōsa agbopa ri iyor Ukiristo

¹ Nggee, umum Uburhu, iki iwe uner ugborzī ri idōsu Utejee, umum ishōrhā umbi aseī nggu amēnkε aka amēē uyisakpi umbō aka ayisa umbi awe aner Unum.

² Àka awe undzumu abika arherhitsu nu ididōr, àka adōng amēmbi, na abima nggu adōka ri ibibema.

³ Àka atsu amēmbi ri igbopa atsimbi awu unying ri Ipfu-Num ru ubok ididōr iki ibow umbi urhōnga.

⁴ Umen kishoo iwe iyora unying nggu Ipfu-Num unying. Umbō ayisa umen ri ifosi unying.

⁵ Umen iwe ru Utejee unying, imangmang unying nu ubōtisima unying.

⁶ Umen kishoo iwe ru Unum nu Utε unying. Unga agha iyerhe ru umen kishoo, atō itser ru ubokmen kishoo na aseī ru umen kishoo.

⁷ Bōr uben unera ru umen umbō aka adzaambō umen imimuta ru utsīndīwi Ukiristo aka abee igasha ngge.

⁸ Ngge itsu Arherhu-Num agōr agε,
<<Ivangyε unga aka azī ra afafā,
unga akū nggu abōo unga aka adzui azīa

na adzowe ízũwã ra anernga.>>*

⁹ Agben <<unga aka azĩ ra afafã>> awu use? Agbena awu ugε unga aka agbaashia acipuwanga ru upfung.

¹⁰ Unga uwuku ucipuwa awu unga hã azĩ ra afafã aka anangke afafã kishoo, ngge itsú unga atōke inanga kishoo nggu itsikamnga.

¹¹ Nggee Ukiristo nibikanga aseng aboo awe abi itser Uyesu, aboo awe abika asom Arherhu-Num, aboo awe abika adzowe Isarhe Iyiki Ize, nu aboo awe abika adarh abika adōsa na awu abika amesuwe.

¹² Unga akorha akεε ha ngge itsú unga agbisha abika adōsa ru umbō atō itser Unum, ngge itsú umbō adzin iyor Ukiristo.

¹³ Akεε ha awuri ikorhuke utseku umen kishoo iki igbopi iwe unying ri imangmangmen nu ihweng Ungwε Unum nu iseng iba iwe undzumu aner ru nyaku Ukiristo ra abina kishoo.

¹⁴ Mōce umen isi íbvui iwemen awεkaci. Abi atapa aka abee ikorhe iki ibewe asi írhemmbo umen. Imesi igberangwĩmbō isi íyiingge umen izĩ ra asu ni izĩ ra andzing ru nyaku ukhukhō amē ibvun amē nu ugba iki iyii.

¹⁵ Bōr ru ubok irherhi idzidzerhe ri ibibema, umen iwuri iseng ni iwe undzumunga ru nyaku Ukiristo aka awu itsia.

¹⁶ Umen iwu iyornga nu umen kishoo igbopa iwe urhōnga ri icim. Iyor iyεε iseng ni idzin itsike ri ibibema, ru nyaku uben ugau ukpōo iki itōitserkpō.

Imesa iyi isisei abika adōsa

* **4:8** Àka anyã ikεi: Amb 68.18.

¹⁷ Nggee umum idɛyiwa umbi akεε ni igbiita atombi nggu ijee iyi Uteijee, ugε awu ufang umbi aneke ikorhe ru nyaka atsen abi Uyahuda iki ikorhe ri ifεrhkɔ iyiki itārḥā.

¹⁸ Umbɔ awe ru uzĩ ri ihwihwεngmbɔ na agau atsimbɔ ri ibibek iyi Unum ri itsi ida ihwihwεngmbɔ iki idze ru iker itsimbɔ.

¹⁹ Ashimbɔ ra atsa, umbɔ adzowe atsimbɔ ri ikorhe abin iyormbɔ iki ibee ngge itsú umbɔ akorhe uben ikpũ abin ishĩ na abee itoma akorhe.

²⁰ Bɔr umbi asi imesumbi ru Ukiristo ru ikpũ atsĩndĩ ḥā.

²¹ Abinkε umbi aka agũ ri itsi Ukiristo nu abinkε umbɔ aka amesuwa umbi ru unga iwu idzidzerhe ha iki idzeku Uyesu.

²² Umbɔ aka amesuwambɔ umbi ugε umbi neke ikorhe ikpũ ibibekmbi iyiki igbe, iyiriye iki iwe iyiki itārḥā ru ubok irhirhem iyi ikponi iyor.

²³ Àka neke Ipfu-Num itsu umbi awe abika afa ri ifεrhkɔ amɛnmbi,

²⁴ na akorhe ru nyaku uner uku ufa, uwuruwi umbɔ aka amuna unga awe ru nyaku Unum ri irhirhika nu isisar iyi idzidzerhe.

²⁵ Nggee uben unera ru umbi awu ufang unga neke igberangwĩ na arherhe idzidzerhe nggu udɔka, ubinkutsu umɛn kishoo iwu agau ri iyora unying.

²⁶ Itseng Arherhu-Num igɔr igε, <<Ri igũ avɔm, umbi niba awembi abi arhim.>>† Niba aneke unum utsĩkpɔ nu umbi ana awe ra avɔm.

²⁷ Niba adzowukumbi ugarh ru Undenggũ.

† 4:26 Àka anyā ikei: Amb 4.4.

28 Unerwi aka awu uvεu awu ufang unga neke ivεu, bɔr atɔ itser. Imēngge unga akũ aboknga atɔ itser iyiki iwe ru ugarh, ngge itsú unga ama akpo ubin unga aka idzowe izũwã ra abika abubee.

29 Niba neke irhεm iyiki itãrhã idzekangge ra angwĩmbi, bɔr aka arherhi irhεm iyiki ize iyiriyε iki iyike ri idzin adɔka ra abinkε umbɔ aka abee, ngge ima idzowe iker ra abirabε aka ikpeto.

30 Niba adakukumbi amēn Ipfu Isarsatangge, iyiriyε Unum aka akũ atsuka utsar ru umbi, ngge idεyiwe ugε ru unum uku utsu uvau unga awuri ifɔrh umbi.

31 Àka atare kishoo amēn aka abewe, isa nu avɔm. Àka aneke ifuw nu irhena adɔka nu uben ikpũ ikpikpěě.

32 Àka awe ru inna na agũ atorh adɔka, àka atsũwe adɔka, ru nyaku Unum aka atsũwã umbi ru ubok Ukiristo.

5

1 Umbi awe awεkaci Unum aka abema, nggee, àka awe abika amesa ru Unum,

2 na aseɪ isei iyi ibibema, ru nyaku Ukiristo aka abema umēn na adzowe itsinga awe idεm Unum ru umēn isung nu idεm ru Unum.

3 Bɔr ru umbi isi imēngge umbɔ agũ arherhe uko irha nggu ubin use unerwi aka asi iwea utsēngo use utsakngo, use ikorhu uben abin atsa, use unyěě, ubinkutsu akεrε ha asi imēke ra abika adɔsa.

4 Ikεi isi imēngge umbi arherha arherhi ishĩ, arherhe agugge use itsui agwerha aki ishĩ. Abin

akεε ha isi imēngge aner Unum akorhe, bər àka awe abika atang awεε ru Unum.

⁵ Umbi ahwεngmbi akarhārḥā ugε uner uwuku urha nggu ubin use unerwi aka asi iwea utsēnga use utsaknga, uner uwuku ukorhu uben abin atsa, use uner unyēē ashia ru ugau ru ukam Iyerhe Ukiristo nu iyi Unum. Uner unyēē awu uner uwuku udzowe igəng ra abin upfung ugεε ake awe Unum.

⁶ Niba aneke unera arḥema umbi nggu irḥem iyiki itārḥā, ubinkutsu ikpū iyi ha itsu avəm Unum iba ra abirabε aka akpēē idəsa unga.

⁷ Nggee àka neke iwe nggu umbə ri ikorhe akεε ha.

⁸ Umbi awe ru uzī ri inggbaashia, bər icεε umbi awe ri irhirhang nggu Uteijee. Àka aseī ru nyaka awε irhirhang,

⁹ ubinkutsu ikpūrhā irhirhang iwe ri iyiki ize, irhirhika, nu idzidzεrhe.

¹⁰ Àka amesa ahwεng ubin Uteijee aka abee.

¹¹ Niba akorhumbi abin uzī aka asi íghwεrke ikpūrhā, bər aka akūna ake adzeka ra awiya.

¹² Awu ubin atsa umən irherha arherhe abinkε abika akpēē idəsu Unum iki ikorhe ri iwək.

¹³ Bər uben ubinkpi aka akū adzeka ri irhirhang anera anyāmbə ngge,

¹⁴ ubinkutsu awu irhirhang itsu umbə anyā uben abin. Ngge itsu itsεng Arherhu-Num igər igε, <<Uzir, ungo uner urhə,

uso ra akpe,
nu Ukiristo arhang ru ungo.>>

¹⁵ Àka akpəm amənmbi ri ibibεkmbi, niba awembi ru nyaka agugge bər àka awe ru isarasu.

16 Àka akorhe iyiki ize uben ivang umbi aka idēē akorhe, ubinkutsu inuma ibewungge.

17 Nggee àka niba awembi agugge, bōr àka ahweng ubin Uteijee aka abee umbi akorhe.

18 Niba afīrhūmbi nggu adε, ake awuri itsu umbi atoma ra arhim. Nu ngge iki iwe rimi, àka awe nggu Ipfu-Num.

19 Àka arherha arherhe nggu adōka ra ambom aki ubvur Unum nu ambom abika adōsa aka amuna nu ambom Ipfu Isarsatangge aka atsu ru umbi. Àka atsū ambom na abar abin ru Uteijee ra amēmbi.

20 Uben ivang àka atar uwεε ru Ute Unum ru uben ubin, ri itsok Uteijeemēn Uyesu Ukiristo.

Akatsērh nu akatsak

21 Àka adzowe atsimbi ra adōka ri iwei Ukiristo.

22 Umbi akatsērh, àka adzowe atsimbi ra atsakmbi ru nyaka umbi iki ikorhuwe Uteijee.

23 Ubinkutsu ukutsa unga awu itsia ru utsēnga ru nyaka Ukiristo aka awu itsia ra abika adōsa, abirabε aka awu iyornga nu unga awe uner uwuku ufōrh umbō.

24 Ru nyaka abika adōsa àka adzowe atsimbō ru Ukiristo, rimi hā akatsērh imēngge umbō adzowe atsimbō ra atsakmbō ra abina kishoo.

25 Umbi akatsak, àka abema atsēmbi, ru nyaku Ukiristo àka abema abika adōsa na adzowe urhēnga ru umbō

26 ngge itsú umbō asar na atēn ri isorh umbō nggu amē ru ubok Arherhu-Num.

27 Unga akorhe akεε ngge itsú unga akū abika adōsa kishoo aba ri itsikamnga ru nyaku us-arkasar utserh uku ufa. Umbō awuri ishimbō na

arhim use utau, bər awuri iwe asarkasar abika asheru uvau.

²⁸ Rimi hã, akatsak àka abema atsẽmbi ru nyaka ayormbi. Unerwi aka abemu utsẽnga abemi itsinga.

²⁹ Unera asi íkpěẽ iyornga, bər unga afuka na agbisha ingge, ru nyaku Ukiristo aki ikorhe ra abika adɔsa,

³⁰ ubinkutsu umɛn iwu agau iyornga.

³¹ Itsɛng Arherhu-Num igər igɛ, <<Akɛɛ ha atsu ukutsa awuri neke utɛnga nu uyanga na agbopa nggu utsẽnga, umbɔ ikivarhambɔ awuri iwe iyora unying.>>*

³² Írhɛm iyɛɛ ha aghong ihwihwɛng, bər umum inu irherhe ake ri itsi Ukiristo nu abika adɔsa.

³³ Nggee ikɛi umum igər ãgɛ ubɛn ukutsak awu ufang unga abemu utsẽnga ru nyaka unga aka abemi itsinga, nu ukutsɛrh awu ufang unga adzowe imor ru utsaknga.

6

Awɛkaci nu atei

¹ Umbi awɛkaci, irhikungge umbi adɔsa ateimbi, ubinkutsu umbi awe abi Uteijee.

² Itsɛng Arherhu-Num igər igɛ, <<Udzowe imor utɛngo nu uyango.>> Nggee iwe ikpem iyi inggbaashia iki iwe nggu ibibemuwe iki igər igɛ,

³ <<Ukorhe rimi nggee ima itsu ungo useisei iyiki ize nu ungo uma ubɛk imɛka írheirhɛ ru upfung.>>*

* **5:31** Àka anyã ikɛi: Ing 2.24.

* **6:3** Àka anyã ikɛi: Iva 5.16.

⁴ Umbi atei, àka neke isa nggu angwẽmbi uben ivang, b̃or àka adzowe umb̃o itsũwã na amesuwe umb̃o ri itsi Uteijee.

Agãrhã nu ateiya

⁵ Umbi agãrhã, àka ad̃osa ateiyaambi abi upfung ru nyaka umbi aka ad̃osu Ukiristo. Àka akorha ake nggu imor nu iwei ra am̃en unying.

⁶ Àka ad̃osa umb̃o asi iwea ug̃e ri inyĩnyã ukpekũ na abee umb̃o akpoi umbi, b̃or ru nyaka agãrhũ Ukiristo, àka akorhe ubin Unum aka abee ra am̃enmbi.

⁷ Àka at̃o itsermbi nggu angg̃om, ug̃e umbi ani it̃owe Uteijee na asi iwea ra anera.

⁸ Ubinkutsu umbi ahw̃engmbi ag̃e Uteijee awuri idzowuka itosa ru uben unera ru ubin uku uze unga aka akorhe, uko ugãrhã use uwuku uf̃on.

⁹ Umbi ateiya, àka akorhe rimi hã ra agãrhãmbi. Niba ag̃ormbi agãrhãmbi ag̃e, <<Ungo uba usi it̃o itser iỹer̃e, umum iwuri ikw̃er ungo.>> Ubinkutsu umbi ahw̃engmbi ug̃e uwu ha aka awe uteiyamb̃o nu uwu umbi awu unying ra afã, na ashia ri itengasu.

Abin iwa Unum

¹⁰ Ri imimasha, àka ad̃ẽẽ aker ru Uteijee nu ru nggaa ijeenga.

¹¹ Àka atsim undzumu abin iwa Unum, ngge itsú umbi ad̃ẽẽ akp̃ẽẽ irhirh̃em Undenggũ.

¹² Um̃en isi itangm̃en iwa nggu anera, b̃or iwu nggu ípfu iyiki ibewe iki iwe ru iỹer̃he nu iker nu ijee ru uzĩ ukpu upfung ukp̃ir̃e nu ípfu iyiki ibewe iyiriye iki ishingge ru upfung ukp̃ir̃e.

¹³ Nggee àka atsim undzumu abin iwa Unum, ngge itsú ivangye unum uku ubewe uku iba, umbi ama aděě atang iwa. Ivang umbi aka itang iwa amaa, umbi awuri iděě akermbi.

¹⁴ Àka aděě aker, nggu ikp̄m idzidzerhe iyiki ibow nu ufurhsĩmbi, nu irhirhika ngge iwe atorho azou aki ikokmbi,

¹⁵ àka atsu abadak, abadak ha awu ru nyaki ididɔr iki idzeki Isarhe Iyiki Ize na atsu umbi agbisha abina kishoo adzeu itang iwa.

¹⁶ Utoma ra akere ha, àka anyangu imangmang ngge iwe urhere aki irhiwuwe urha agwee Undenggũ aka itang umbi

¹⁷ Àka atsim ifur azou iyi ififorh, na anyangu ikon ikider iyi Ipfu-Num, ike iwu Arherhu-Num.

¹⁸ Na afen-Num uben ivang na aneke Ipfu-Num idarh umbi ru uben ikpũ ifen-Nummbi nu ifen. Àka atsu asumbi na abima ri ifen-Nummbi ra abika adɔsa kishoo.

¹⁹ Ikei àka afena-Num ru umum, àka afen Unum unga ama adzaa umum irhemye umum iki ikũ ideyiwe anera abinke umbɔ aka awok ri Isarhe Iyiki Ize nggu ikeramen.

²⁰ Umum iwe ru ugborzĩ icere ri idzowe Isarhe Iyiki Ize ha. Àka ifen-Num ru umum ima idzowe ngge ugeε Unum aka abee nggu isheri iwei.

Imimasha ighwe

²¹ Utikiku awu ungwēmen umen iki ibema nu uner itser idzidzerhe ru Uteijee. Unga awuri ideyiwanga umbi uben ubin, ngge itsú umbi ikei ama ahweng iwiwe umum nu ubinkpi umum iki ikorhe.

²² Umum idene unga aba ru umbi ra abin akεε, ugε umbi ama ahwεng iwiwe umεn, nu unga ama afituwa umbi.

²³ Unum Utε nu Uteijee Uyesu Ukiristo ama adzaa umbi ididɔɔr, umbi angwẽmεn nu ana-pumεn. Umbɔ ama atsu umbi atoma ri ibema adɔka nu iwe ru imangmang ru Ukiristo.

²⁴ Imimuta iwe nggu kishoo abika abemu Uteijeemεn Uyesu Ukiristo nggu ibibemayε iki isi ikpengge.

**Ibibemuwe-Num Iyiki Ifa Ru Dũya
Duya: Ibibemuwe-Num Iyiki Ifa Ru Dũya (New
Testament)**

copyright © 2024 Wycliffe Bible Translators, Inc.

Language: (Duya)

Translation by: Dũya Development Association

Contributor: SIL Nigeria

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 8 May 2025 from source files dated 8 May 2025

3ccd0531-8578-54e4-a023-62d4592e4b27